

Месяца иулиа в 4-й день
Преподобнаго Андрея Иконописца
На велицей вечерни
Блажен муж: 1-й антифон.

На Господи, возвах: стихиры, глас 3:

Приидите, вернии, руками восплещим, и возрадуемся, и прославим/ преподобнаго Андрея,/ от родов наших избраннаго,/ иже Воплощенное Слово во образех истинно воплоти,/ да воззрят людие и познают,/ яко Господь есть Христос, Избавитель мира. Чистоту ума и сердца,/ целомудрие и кротость возлюбив, отче Андрее,/ очерневшее естество мира сего отвергл еси/ и устремился еси к Совершенному,/ Иже Тройческий имать образ и число./ Темже любовь и красоту совершенную/ Господа Славы познал еси.

Сораспаялся еси Христу любовию, блаженне,/ на Кресте видя Единаго от Троицы,/ Его же показуеши во образех пребывающа/ и, Церкви послушен быв всегда,/ нас поучающи Тому поклоняться, вопия:/ слава Создавшему вся.

Ины стихиры, глас 5:

Сердце твое утвердил еси в Господе/ и образ Премудрости и Силы,/ Христа, за ны распеншагося,/ во иконех явил еси, преподобне,/ иудеом соблазн, еллином безуме,/ нам же верных Спасение.

Глас Ипостасныя Премудрости, Христа,/ услышал еси, отче, зовый:/ аще кто безумен, обратися ко трапезе Моей,/ Аз бо есмь начало и конец./ Трапезы оныя наслаждался еси, преподобне,/ и возвеселился еси о спасении,/ еже Слово принесе Воплощенное,/ и во образех показуеши пир Господень,/ уготованны званным Его. Вся премудростию сотворшаго Господа/ достойно прославил еси,/ но не похвалился еси мудростию твоею, отче преподобне,/ хвалишися бо о еже разумети и знати Господа,/ спасающаго нас Крестом Своим.

Слава, глас 4:

Изначала даром облечен бысть человек/ тварем имена нареци,/ Христос же верным власть даде/ в вещественных образех Божественная печатлети, / и яко Луку от Апостолов,/ такожде и тя от Церкви Российския призва, избранниче Божий,/ ко священному иконописанию,/ да прославится чрез образы сила содетельная Творца и Господа.

И ныне, Богородичен.

Вход. Прокимен дне. И чтения три:

Бытия чтение (18, 1-8, 17-33).Притчей чтение (9, 1-11).

Премудрости Соломони чтение (3, 1-9).

На литии стихиры, глас 4:

Житием иноческим и подвиги/ Церковь нашу Православную прославил еси, преподобне Андрее,/ в нейже яко в Теле Христове пребывая,/ достигл еси обожения/ и сонму святых приобщился еси.

Образ Пресвятыя Троицы на иконе начертал еси,/ нерожденна Отца,/ предвечно рожденна Сына,/ Духа, от Отца исходяща,/ и сим научаеши таинственному догмату Православныя веры,/ Андрее преподобне.

Слава, глас 8:

Якоже Великий Сергий/ воздвиже храм Святыя Единосущныя Троицы,/ изгоняя страх ненавистныя розни мира сего,/ такожде и ты, отче Андрее, начертал еси Святыя Троицы образ,/ заповедуя нам единомыслие веры в Церкви Святей хранити,/ идеже несть разделения,/ но всяческая и во всех Христос.

И ныне, Богородичен, глас тойже:

Тя и плоть Твою Приявшаго/ зряще во святых образех, Пренепорочная Владычице,/ чудо познаем нашего спасения/ и простираемся к любви Твоей,/ да будем избавлены суда и смерти,/ и поклоняемся, и славим,/ возсылающе Ти первообразную честь, Богородице.

На стиховне стихиры, глас 1:

Троицу во Единице/ Бог и Господь праведному Аврааму сокровенно откры,/ Церковь же явственне научи тайне Единосущия Божества,/ ты же, преподобне, иконою Пресвятыя Троицы,/ яко печатию, утвердил еси спасительное ведение сие,/ да нерушимо исповедуем Троицу Единосущную и Нераздельную. Стих: Честна пред Господем/ смерть преподобных Его.

Зрением образа Пресвятыя Троицы, преподобне Андрее,/ яко в чертог входим Небеснаго Царя,/ Ему же ныне предстоиши во одеянии брачном/ со Авраамом и всеми святыми,/ в невечернем свете принося хваления,/ молиши о нас не престай Владыку всех,/ да со избранными Его сопричтемся.

Стих: Блажен муж, бояйся Господа,/ в заповедех Его восхощет зело.

Образу Пресвятыя Троицы,/ егоже писал еси, преподобне,/ сила благодатная дадеся:/ зрительне бо открываеши Истину,/ Юже Пилат безумне отрину,/ Авраам же в поклонении трием Ангелом свидетельствова,/ да и мы спасительное поклонение Истинному Богу воздадим/ и жертву принесем благодарения.

Слава, глас 1:

Неведомей тайне Единицы,/ в Трех Лицах таинственно пребывающия,/ тайною веры приобщился еси, преподобне,/ и море искушений и страстей, яко сушу, прешед,/ Избавителя и Бога прославляеши/ во святых твоих образех.

И ныне, глас тойже:

Неизследимо и никакоже мыслимо/ Первообразнаго во плоти от Тебе, Владычице, явление,/ Егоже Рождеством нас спасла еси.

Тропарь, глас 3:

Божественнаго света лучами облистаемый,/ преподобне Андрее,/ Христа познал еси, Божию Премудрость и Силу,/ и иконою Святыя Троицы всему миру проповедал еси/ Единство во Святей

Троице,/ мы же со удивлением и радостью вопием ти:/ имеяй дерзновение ко Пресвятей Троице,/ моли просветити души наша.
На утрени

По 1-м стихословии седален, глас 6:

Видите крины сельныя, рече Христос, о ученицы,/ краше бо Соломона во славе его одеяни суть,/ Аз же возлюбих вас, яко образ Мой и подобие,/ да будете усыновлены благодатию./ Сего же дара, преподобне, сподоби нас молитвами твоими.

Слава: Святая Православная Церковь, иконою твоею, преподобне, учит:/ Отец имать Сына и имать Святаго Духа,/ и не глаголем, яко Трие суть Бози, но Един Бог Трие Сии/ и равни Существом и Божеством и властью.

И ныне: Прибегающе присно ко пречистым иконам Твоим, Богородице,/ теми обретаем вся блага ныне,/ н живота конец добр и непостыден,/ и на воздухе бесов зрак Тебе ради не узрим,/ и избежим держащих рукописания согрешений наших.

По 2-м стихословии седален, глас 6:

Око не виде, и ухо не слыша, и на сердце человеку не взыдоша,/ яже уготова Бог любящим Его./ Сея же неизреченныя райския красоты/ да сподобимся и мы, молитвами преподобнаго.

Слава: Неизреченна и несказанна Святыя Троицы тайна,/ ни Ангельскими, ни человеческими помышленьми постижима,/ паче бо начертаннаго преподобным Андреем образа Божественный Первообраз есть,/ Ему же вси поклонимся сердцем, умом и помышлением.

И ныне: Паче дыхания, предстательства Владычицы Марии требуем,/ Та бо, яко Мати Божия, всем призывающим имя Ея/ благая и полезная дарует.

В сердцах избранных незримо печатлея Божественный зрак,/ сам сый орудие Пресвятаго Духа,/ горния красоты нам являеши видение/ и человеки наставляеши ко спасению, преподобне,/ моли Превечную Троицу, Ей же со Ангелы предстоиши,/ спаситися душам нашим.

Прокимен и Евангелие преподобному.

По 50-м псалме стихира, глас 6:

Ни Ангел, ниже человек, но Сам Христос образотворцев Начальник явися,/ егда запечатле на убрусе Свой Божественный лик./ Ты же, преподобне,/ под покровом Его всегда пребывая,/ Духом Святым научен еси образы творити.

Канон, глас 4.

Песнь 1

Ирмос: Поем песнь победную Единому Богу,/ сотворшему преславная,/ древле бо фараона/ со всевоинством в мори погрузи. Приидите, вернии,/ со преподобным Андреем песнь победную воспоим/ и возславим пресвятую Троицу, Отца и Сына и Святаго Духа.

К преподобному Сергию, якоже достойный ученик, блаженне Андрее, притекл еси,/ и чрез того Святым Духом наставлен был

еси,/ и вкупе с богоносными Сергием и Никоном,/ трие прослависте Троицу во Единице.

Сергия великаго достойне прославил еси, яко чтителя Пресвятыя Троицы,/ емуже усердно подражал еси,/ и нас научаеши достойно поклоняться Единому Богу,/ в Трех Лицах нераздельно Сущему, Сотворшему Небо и землю.

Слава: Сергием богомудрым научен, древним богословом подобен явился еси, преподобне Андрее,/ и яко тии словом, тако ты иконою догмат Троицы проповедал еси в стране Российстей,/ и ныне исповедати сей всех научаеши.

И ныне: Радуйся, Богородице Дево,/ радуйся, Владычице мира,/ в Тя бо вселися Един от Святыя Троицы,/ сего ради имаши силу спасти погибающия,/ спаси рабы Твоя, молящияся Тебе.

Песнь 3

Ирмос: Утвердися сердце мое в Господе,/ вознесся рог мой в Бозе моем:/ яко несть свят, паче Тебе, Господи.

Сердце твое утвердил сси в Господе, отче преподобне,/ и душу очистил еси покаянием,/ тело же предал пощению и трудом,/ и обитель Пресвятыя Троицы явился еси,/ Юже моли о спасении душ наших.

Возлюбил еси Господа всем сердцем, досточудне Андрее,/ и любовию на враги вооружился еси, всех желая обрести Пресвятей Троице,/ и всех зовещи Господа возлюбити любовию неутолимою. Верою сердце утвердил еси незыблемо в Господе, / и славу Небесную созерцал еси сердечныма очима,/ и благодатию Духа Святаго показуеши в вещественных образех невестественная,/ да и мы ныне пробудимся от сна греховнаго и узрим свет Истинный.

Слава: Возвеселился еси всем сердцем о Господе,/ и по всей земли прославил еси в совершенных образех Победителя смерти,/ и ныне пребываеши в непрестанней радости, восходя от славы к славе,/ и воспеваеши со Ангелы Пресвятую Троицу.

И ныне: О, Божественнаго промысления несказаннаго!/ От земных явилася еси, Пресвятая Дево Богородице,/ и соделалася еси мира Владычица, Мати Ипостаснаго Слова,/ Егоже моли, Заступнице, о спасении нашем.

Седален, глас 8:

Ангельский образ прием, образ и подобие Творца ангельским житием в себе возставил еси,/ и во образе вещественнем Образ Первообразнаго начертал еси, преподобне,/ и к истинному богоподобию указуеши путь.

Слава, и ныне, Богородичен:

Непрестанно и радостно прославляет Тя Церковь, Пресвятая Владычице,/ чудотворными бо образы Твоими мир просвещаеши/ и милости великия всегда изливаеши к Тебе притекающим с верою.

Песнь 4

Ирмос: Вознесена Тя видевши Церковь на Кресте,/ Солнце Праведное,/ ста в чине своем,/ достойно взывающи:/ слава силе

Твоей, Господи.

Подвигом таинственно стяжал еси в Церкви пребывание,/ учением ея последуя, преподобне,/ и, уставы святых Церкви исполняя, образы начертал еси священные,/ ихже почитающе, вопием:/ слава силе Твоей, Господи.

Учение отцев Церкви ревностно исполнил еси, преподобне,/ волю бо свою отсекая, не своя измышления, но тех видения начертал еси,/ смирением же в меру их достигнув, Церкви свидетельство утвердил еси, зовый:/ слава силе Твоей, Господи.

Крест Христов, Иже есть любовь Пресвятыя Троицы, прославил еси, преподобне,/ Крест, Церкви утверждение, возлюбил еси,/ путем Крестным шествовав, сему поклонятися всех зовещи, поя:/ слава силе Твоей, Господи.

Слава: Верую Христа в сердце вселив, блаженне Андрее,/ со всеми святыми постигл еси, что есть широта и долготы, глубина и высота святых Церкви,/ и иконами показуещи тайны Царствия Небеснаго, глаголя:/ слава силе Твоей, Господи.

И ныне: Вознесена видящи, Богородице, на Кресте, Сына и Творца Твоего,/ оружием в сердце уязвлена была еси,/ Страстем Крестным Сына Твоего состраждущи,/ но неизреченную познала еси радость в Воскресении Его/ и славною силою Христовою спасаеши Тебе молящихся.

Песнь 5

Ирмос: От света пресекий первородный свет,/ яко во свете дела поют Тя, Христе, Содетеля,/ во Свете Твоем пути наша направи. Сергием великим водим, преподобне, к Трисиянному Свету пришед/ и Сим облистаем, прославил еси Трисветлое Солнце, Творца и Бога, создавшего вся.

Великия благодати сподобился еси, преподобне,/ умом вознесыйся к невещественному и невидимому свету Пресвятыя Троицы./ Сей свет видеша апостоли на Фаворе,/ Афонстии же отцы со святым Григорием исповедаша яко нетварную силу Божию.

По блаженнем созерцании образа/ неизреченную красоту первообраза во свете Своем откры ти Господь, блаженне отче,/ и нас учиши честь и поклонение воздавати,/ не вещь почитая, но первообразную красоту.

Слава: Неизреченнаго и Божественнаго Первообраза свет и блистание/ отчасти показуещи, преподобне, в тварном подобии,/ на негоже взирающий с молитвою дух ведения почерпают.

И ныне: Отчее Сияние пройде чрез Тя, Владычице,/ и, плоть от Тебе восприявше, световидно Тя преобрази,/ яко превышши еси чинов Ангельских и всякия твари.

Песнь 6

Ирмос: Пожру Ти со гласом хваления, Господи,/ Церковь вопиет Ти,/ от бесовския крове очищися,/ ради милости от ребр Твоих/ истекшею Кровию.

Толику добродетель и толико тщание/ о постничестве и иночестем

жителстве имея, преподобне,/ яко точию в Божественней любви преуспевати, в земных николиже упражняться,/ сего ради прославлен еси от Господа.

Имя твое и подвиги возжелел еси угаити смиренномудрия ради, отче Андрее,/ Видяй же тайное, яве прослави тя пред Ангелы и человеки.

Вселенную всю удивил еси, преподобне,/ возсиял бо еси в утесненной и страждущей земли Российстей, от множества враг боримей,/ и тако возмогл еси миру всему право проповедати Пресвятую Троицу.

Слава: Дивныя Своя суды на тебе яви Господь,/ пред Нимже тысяща лет, яко день един,/ избра тя в древния веки, прославити же восхоте в конце времен, во утверждение Церкви.

И ныне: Славнейшая без сравнения горних воинств,/ в Церкви, яже есть Тело Христово, в неизследимей глубине и средоточии пребываеши,/ плоть Твою Христу заимодавшая, моли Сына Твоего помиловати нас.

Кондак, глас 8:

От юности к Божественней красоте устремляясь,/ чудный иконописец в земли Российстей был еси,/ и, богоносным твоим учителем поревновав,/ сиянием добродетелей украсился еси, преподобне Андрее,/ темже и явися Церкви наша похвала и радование.

Икос:

Паче меры всякия благодать даровася ти, преблаженне отче,/ святыя иконы писати, наипаче же образ Пресвятыя Троицы;/ Бога миру проповедуя, Бога Отца, Бога Сына, Бога Духа Святаго,/ Иже есть Едино Существо в Трех Ипостасех, Едино Естество в Трех Лицах,/ и Едина Премудрость, и Едина Сила, Едино хотение, и Едино Божество./ Темже и явися Церкви наша похвала и радование.

Песнь 7

Ирмос: Образу златому не поклонившися, отроцы авраамсти и/ искушахуся, яко злато в горниле, / в печи огненной, яко в чертозе светлем, / ликовоаху, поюще:/ благословен еси, Боже отец наших. Огнем вещественным искушаеми в печи,/ трие отроцы прообразиша некогда Святую Троицу,/ ты же, преподобне, огнем Духа Святаго просвещаем,/ нам показал еси образ Пресвятыя Троицы, да поем:/ благословен еси, Боже отец наших.

Истукана златаго посрамиша трие отроцы в Вавилоне, яко мертвыя,/ ты же, преподобне, учению Церкви последуя,/ образы свидетельствуши о Жизнодавце, Слове Воплощеннем, да вопием:/ благословен еси, Боже отец наших.

Подвиги различными искушен быв, яко злато в горниле, преподобне,/ ныне в чертозах светлых Отца Небеснаго ликуеши, взывая:/ благословен еси, Боже отец наших.

Слава: В световидных твоих образех явил еси, преподобне,/ неизглаголанними дыханьми Духа путь к Богу, да им шествующе,

глаголем:/ благословен еси, Боже отец наших.

И ныне: Светлый чертог непрестанного веселия являешься,
Царице и Владычице,/ яко Тобою избавляемся адския печи
огненные, и Твоему образу кланяющемся, поем:/ благословен еси,
Боже отец наших.

Песнь 8

Ирмос: Во огни пламеннем предстоят Тебе/ Херувими, Серафими,
Господи,/ и вся тварь песнь Тебе поет красную:/ пойте,
благословите, людие превозносите Христа,/ Единого Содетеля во
вся веки.

Подвиги видящи твоя, проеподобне, радуется о тебе Церковь,
вкупе и дивится:/ како приблизился еси ко огню

Пресущественныя Троицы,/ Еяже трепещут силы Ангельския, и
не опалился еси.

Господа и святых Его лики живописуя,/ подвигом оных усердно
подражал еси, преподобне,/ пламенем непрестанныя молитвы
сердечныя сонмища помыслов злых попалил еси.

Архангели, Ангели и вся Небесныя силы/ таинственно и со
страхом прославляют Господа непрестанными гласы,/ ихже
показал еси, яко воочию видево, сам быв земный Ангел,/ ныне же с
ними предстоиши у престола Святыя Троицы.

Слава: Апостоли, пророцы, святителие, мученицы, преподобнии и
вси святии/ непрестанно прославляют Господа священными
песнопеньми,/ ихже славу явил еси во святых твоих образах, сам
быв небесный человек,/ ныне же с ними предстоиши у Престола
Святыя Троицы.

И ныне: Яко во огонь вошла еси, пресвятая Дево,/ егда изволи
вселитися в Тя Слово Ипостасное,/ Имже обожена и преображена
и тако на Небеса прията, мира не оставила еси.

Песнь 9

Ирмос: Тя, яко село пречистого Слова,/ и приятелище Духа,/ и
Благоволения делателище поем,/ в Тебе бо соизменение спасения
нашего соделася.

Дадеся ти благодать, преподобне, образ написати пресвятыя
Троицы/ в Божественном и царstem и ангельstem подобии,/
показуя господственное и владычественное, безначальное и
безконечное,/ яко предаша ти святии отцы.

Дивный образ пресвятыя Троицы начертал еси, преподобне,/ от
вещнаго сего зрака ум наш и мысль вознося к Божественному,/ не
вещь убо чтим, но Святую Троицу,/ честь бо, иконе воздаваемая,
на первообразное восходит.

Дух Святыи води твоима рукама, преподобне,/ егда писал еси
образ пресвятыя Троицы, в немже веру в Триединого Бога
показуеши.

Слава: Славы ради Пресвятыя Троицы, Юже ты, преподобне,
начертал еси,/ Трисвятая песнь Трисвятей и Единосущней и
Животворящей Троице на земли приносится:/ Свят, Свят, Свят
Господь Саваоф, исполнь Небо и земля славы Твоя.

И ныне: Неизреченное есть благоволение Пресвятыя Троицы к Тебе, Богородице,/ введением бо Твоим во Святая Святых величие Твое преднаписанно,/ волею Отца, приятием Святаго Духа, вселением Сына/ Святая Святых Церкви Христовы быти сподобилася еси.

Светилен:

Ученик великаго Сергия быв, преподобне Андрее,/ яко светильник превознесенный возсиял еси, блистая лучами Божественнаго светолития,/ Христа стяжал еси в сердце твоём, Егоже моли просветити души наша.

На хвалитех стихирь, глас 4:

Дивныя красоты священнаго художества твоего,/ богомудре Андрее,/ недоумеем язык изъяснити,/ свидетельствуеши бо земным о Небесном/ чудными иконами твоими/ и прославляеши Пресвятую Троицу/ силою дарованнаго ти Духа./ Мы же память твою ублажаем, зовуще:/ преподобне отче Андрее, моли Бога о нас.

Торжествует Церковь ныне,/ преподобне Андрее,/ Троицу бо Пресущественную, Истиннаго Бога, прославил еси/ и Слово Воплощенное, Крестом вселенную искупившее, вообразил еси,/ икон же почитанию всех поучаеши,/ показуя Истину во образех,/ Юже ныне созерцаеши явственно.

Силою непостижимаго всех Творца,/ в Трех Лицех Единого,/ Христово подобие в Тебе обновил еси, отче Андрее,/ молитвами же твоими нам помози/ обновити и просветити души наша.

Слава, глас 5:

Днесь торжествует Святыя Троицы обитель/ с Сергием и сонмом ученик его,/ и со Андроником и Саавою радуется обитель Спасова,/ израстившия земли Российския храмов дивнаго украсителя,/ егоже достойно хвалим и просим усердно:/ преподобне Андрее, моли Пресвятую Троицу/ даровати душам нашим мир и велию милость.

И ныне, глас тойже:

Утоли болезни/ многовоздыхающия души моя,/ утолившая всяку слезу от лица земли,/ Ты бо человеком болезни отгониши/ и грешных скорби разрушаеши,/ Тебе бо вси стяжахом надежду и утверждение,/ пресвятая Мати Дево.

Славословие великое.

На Литургии служба вся преподобническая

Молитва

О, преподобне отче Андрее, зело облагодатствованный пресветлым даром видения первообразов красоты Божественныя! О дивный плоде Церкви Российския, отрасли благая Сергием великим насажденнаго древа! В грозное бо время постави тя Господь свидетеля своего и земли наша молитвенника велика ты содела. Кто исповесть безчисленныя труды и подвиги твоя, разум земный превосходящия и единому токмо ведомыя Господу, имиже благодать писания чудотворящих икон стяжал еси! Ты

благоуханием святых твоих икон весь мир исполнил еси, наипаче образом Пресвятыя Троицы, да воззрением нань побеждается всякий грех и ненавистная рознь мира сего. О преподобне и пречудне отче, призри с высоты, идеже в Божественном свете пребываеши, и услыши молитвы нас, грешных, и, яко имеяй дерзновение ко Пресвятей Троице, со преподобным Сергием и всеми святыми моли Владыку всех, о еже Церковь его укрепити, разобщенныя соединити, расточенныя собрати и в разумение истины всем приити, отвратити от нас праведный гнев Свой и исполнити даров Духа Святаго, любви, радости, мира, долготерпения, благости, милосердия, веры, кротости, воздержания, земное же странствие прейти нам, грешным, безбедно, в будущем же веце сподобитися с тобою и всеми святыми прославляти Пресвятую Троицу, Отца, и Сына, и Святаго Духа, ныне и присно, и во веки веков. Аминь.